

氏族典第四百九十三卷

正姓部彙考

廖用賢尙友錄 正姓

正之盛切子姓周正考父之後

正姓部列傳

周 正考父

按萬姓統譜正考父宋上卿

正常

按左傳哀公三年秋季孫有疾命正常曰無死南孺子之子男也則以告而立之女也則肥也可季孫卒康子卽位既葬康子在朝南氏生男正常載以如朝告曰夫子有遺言命其圉臣曰南氏生男則以告於君與大夫而立之今生矣男也敢告遂奔衛康子請退公使共劉視之則或殺之矣乃討之召正常正常不反

漢 正錦

按尙友錄錦漢武帝時獻寶鼎

元 正鑑

按臨清州志鑑太原人徙臨清彰信鄉家焉至元間以勇力善射授武烈將軍平原路總管

明 正復 正閏 正稜

按萬姓統譜復合肥人洪武乙卯舉人大同府教授

按萬姓統譜閏綏寧人洪熙中任信靈縣

丞 按高唐州志稜福建莆田人監生任訓導

姓姓部彙考

廖用賢尙友錄 姓姓

姓姓望出臨淄今南海有此族

姓姓部列傳

漢 姓偉

按漢書貨殖傳成哀間姓偉訾五千萬注師古曰姓姓名偉也

明 姓秉恭

按萬姓統譜秉恭嘉靖間廣東南海縣貢士

孟姓部彙考

廖用賢尙友錄 孟姓

孟平陸羽音魯桓公子慶父之後號孟孫因氏又望出東海

凌迪知萬姓統譜 孟姓

孟氏有二魯慶父之後爲孟氏又衛公孟縶之後亦爲孟氏

孟姓部列傳

周 孟獻子

按左傳宣公九年夏獻子聘于周王以爲有禮厚賄之

孟張

按左傳成公十七年卻至奉豕寺人孟張奪之卻至射而殺之

孟樂

按左傳襄公四年無終子嘉父使孟樂如晉因魏莊子納虎豹之皮以請和諸戎

孟孺子

按左傳襄公十六年秋齊侯圍郕孟孺子速微之齊侯曰是好勇去之以爲之名速遂塞海陘而還

孟孝伯

按左傳襄公二十四年孟孝伯侵齊晉

孟椒

按左傳襄公二十三年臧紇致防而奔齊其人曰其盟我乎臧孫曰無辭將盟臧氏季孫召外史掌惡臣而問盟首焉孟椒曰盍以其犯門斬關季孫用之乃盟臧氏臧孫聞之曰國有人焉誰居其孟椒乎

孟僖子

按左傳昭公七年三月公如楚鄭伯勞於師之梁孟僖子爲介不能相儀及楚不能郊勞

孟懿子

按左傳昭公七年九月公至自楚孟僖子病不能相禮乃請學之苟能禮者從之及其將死也召其大夫曰禮人之幹也無禮無以立吾聞將有達者曰孔丘聖人之後也我若獲沒必屬說與何忌於夫子使事之而學禮焉故孟懿子與南宮敬叔師事仲尼

孟丙

按左傳昭公二十八年秋晉韓宣子卒魏獻子爲政分祁氏之田以爲七縣分羊舌氏之田以爲三縣孟丙爲孟大夫

孟之側

按左傳哀公十一年師及齊師戰於郊齊師自稷曲師不踰溝樊遲請三刻而踰之如之衆從之師入齊軍右師奔齊人從之陳瓘陳莊涉泗孟之側後入以爲殿抽矢策其馬曰馬不進也

孟孺子洩

按左傳哀公十四年孟孺子洩將圉馬於成成宰公孫宿不受曰孟孫爲成之病不圉馬焉孺子怒襲成從者不得入乃反成有司使孺子鞭之秋八月辛丑孟懿子卒成人奔喪弗內袒免哭于衢聽共弗許懼不歸

孟武伯

按左傳哀公十七年公會齊侯盟於蒙孟武伯相齊侯稽首公拜齊人怒武伯曰非天子寡君無所稽首武伯問於高柴曰諸侯盟誰執牛耳季羔曰鄫衍之役吳公子姑曹發陽之役衛石魋武伯曰然則彘也

孟公綽

按萬姓統譜公綽爲趙魏老則優不可以爲滕薛大夫

孟軻

按史記孟子傳孟軻鄒人也受業子思之門人道旣通游事齊宣王宣王不能用適梁梁惠王不果所言時諸侯方務合從連衡以攻伐爲賢而孟軻乃述唐虞三代之德是以所如不合退而與萬章

之徒序詩書述仲尼之意作孟子下篇

孟賁

按尙友錄賁周勇士

孟說

按史記秦本紀武王有力好戲力士任鄙烏獲孟說皆至大官王與孟說舉鼎絕膂武王死族孟說

漢 孟卿

按漢書孟卿傳卿東海人也事蕭奮以授后倉魯閭丘卿倉說禮數萬言號曰后氏曲臺記

孟舒

按漢書田叔傳賈高謀弑上事發詔捕趙王隨者罪三族孟舒田叔等衣赭衣自髡鉗隨至長安赦事曰上說拜舒雲中守坐鹵大入免文帝召田叔問天下長者田叔以舒對上曰賢哉復拜雲中守

孟但

按漢書儒林傳田授易東武王同何授廣川孟但爲太子門大夫

孟喜

按漢書孟喜傳喜字長卿東海蘭陵人也父孟卿以禮經多春秋煩雜乃使喜從田王孫受易喜好自稱譽不見信舉孝廉爲郎曲臺署長病免爲丞相掾博士缺衆人薦喜上聞喜改師法遂不用喜喜授同郡白光少子沛翟牧子兄皆爲博士

孟通

按漢書王莽傳武功長孟通浚井得白石上圓下方有丹書著石曰告安漢公莽爲皇帝莽風羣公以白太后遂稱攝皇帝

後漢 孟嘗

按後漢書孟嘗傳嘗字伯周會稽上虞人仕郡爲戶曹吏後策孝廉舉茂才拜徐令遷合浦太守百姓稱爲神明以病自止被徵當還吏民攀車諸之夜遁去隱處窮澤身自耕傭同郡楊喬上書薦嘗竟不見用卒於家

孟郁

按續漢書郁中常侍孟賁之弟

孟敏

按尚友錄敏字叔達鉅鹿人性剛直有剖決不仕嘗客居太原荷甕墮地不顧而去郭泰見而問之敏曰甕已破矣視之何益泰奇之因勸令學卒以成德三公徵辟並不屈

孟節

按尚友錄節得仙道能含棗核而不食可至五年十年又能結氣不息狀若死人亦可至五年十年

孟光

按蜀志孟光傳光字孝裕河南洛陽人漢太尉孟郁之族靈帝末爲講部吏獻帝遷都長安遂逃入蜀先主定益州拜爲議郎掌制度後主踐阼遷大司農每直言無所迴避坐事免官卒

魏 孟康

按魏略康爲弘農守平清領郡吏二百餘人涉春遣休常四分遣一分無宿諾

晉 孟宗

按尙友錄宗字公武江夏人少從南陽李肅學其母爲作厚褥大被人問故母曰小兒無德致客客多貧故爲廣被庶可得氣味相接矣仕吳爲令每得時物必以寄母不敢先食母嗜筍尙末生宗入林哀泣筍忽迸出聞母病犯禁委官晉武帝時爲魚池監作鮓寄母母曰何不避嫌遂還之宗嘗爲光祿與朝士大會有強之酒者飲一杯便吐半是麥飯上聞歎息曰清德如此耶

孟觀

按晉書孟觀傳觀字叔時渤海東光人少好讀書惠帝卽位稍遷殿中中郎賈后欲誅楊駿使人諷觀觀度后旨頗加誣其事及駿誅以爲黃門侍郎氏羌齊萬年反張華啟觀討之觀生擒萬年轉東羌校尉徵拜右將軍趙王倫篡位署爲安南將軍義軍旣起觀不從衆議而爲倫守及帝反正遂夷三族

孟嘉

按晉書桓溫傳孟嘉字萬年江夏鄆人吳司空宗曾孫也少知名太尉庾亮領江州辟部廬陵從事後爲征西桓溫叅軍轉從事中郎遷長史卒

孟陋

按晉書孟陋傳陋字少孤武昌人吳司空宗之曾孫也兄嘉桓溫征西長史陋清操絕倫布衣蔬食以文籍自娛口不及世事簡文帝輔政命爲叅軍稱疾不起以壽終

孟欽

按晉書孟欽傳欽洛陽人也有左慈劉根之術百姓惑而赴之苻堅召詣長安命苻融誅之欽化爲旋風飛出第外頃之有告在城東者融遣騎追之垂及忽然已遠遂不知所在堅末復見於青州苻朗尋之入於海島

孟昶

按晉書安帝本紀義熙四年四月甲午加吏部尙書孟昶尙書左僕射六年五月衛將軍劉毅及盧循戰於桑落洲王師敗績尙書左僕射孟昶懼自殺

宋 孟懷玉

按宋書孟懷玉傳懷玉平昌安丘人也高祖珣晉河南尹祖淵右光祿大夫父綽給事中世居京口

高祖東伐孫恩以懷玉爲建武司馬義熙三年出爲西陽太守除中書侍郎轉輔國將軍領丹陽府兵戍石頭八年遷江州刺史十一年卒官

孟龍符

按宋書孟懷玉傳龍符懷玉弟也驍果有膽氣早爲高祖所知旣克京城以龍符爲建武參軍除東海太守高祖伐廣固以龍符爲車騎將軍統步騎爲前鋒軍達臨朐與賊爭水賊退走龍符乘勝奔逐後騎不及賊數千騎圍繞攻之衆寡不敵遂見害

孟顗

按宋書何尙之傳孟顗字彥重本昌安人兄昶貴盛顗不就徵辟昶死後起家爲東陽太守遂歷吳郡會稽丹陽三郡侍中僕射太子詹事復爲會稽太守卒官子劭尙太祖第十六女南郡公主

孟靈休

按南史徐湛之傳安成公何最無忌之子臨汝公孟靈休昶之子也並名奢豪與湛之以肴膳器服車馬相尙都下爲之語曰安成食臨汝飾湛之美兼何孟靈休善彈棋官至祕書監

北魏 孟威

按魏書孟威傳威字能重河南洛陽人歷東宮齊帥羽林監後以解北人之語敕在著作備推訪永平中出使高昌還遷城門校尉直閣將軍正光初蠕蠕主阿那瓌還國以威爲平北將軍假員外常侍爲使主護送之普泰中除大鴻臚卿天平三年卒

孟表

按魏書孟表傳表字武達濟北蛇丘人也自云本屬北地號索里諸孟因事南渡仕蕭鸞太和十八年據郡歸誠除南兗州刺史領馬頭太守後蕭鸞遣裴叔業攻圍六十餘日表戮力固守高祖嘉其誠績封汶陽縣開國伯遷征南將軍濟州刺史延昌四年卒諡曰恭子崇襲官至昌黎濟北二郡太守

孟季

按魏書孟威傳威弟季稍遷鎮遠將軍左中郎將廷尉監廣州刺史預介朱榮義舉封鉅鹿縣開國公轉司農卿出爲華州刺史卒

孟蘭彊

按魏書石文德傳白石縣人孟蘭彊四世同居行著州里詔標榜門閭

孟鸞

按魏書孟鸞傳鸞字龍兒不知何許人坐事充閹人文明太后時王遇有寵鸞以謹敏爲過左右由是漸見眷識靈太后臨朝爲左中郎將中給事中病亡

孟信

按尙友錄信字修仁仕魏從孝武帝爲趙平太守政尙寬和權豪無犯山中老人曾以麝酒饋之信和顏接引慰勸慰勞乃自出酒以鐵鐺溫之素木盤盛蕪菁燂唯此而已又以一鐺借老人但執一杯各自斟酌申酬酢之意謂老人曰吾至郡來無人以一物見遺今卿獨有此餉且食菜已久欲爲卿受一麝脯耳酒旣自有不能相費老人大悅再拜擘麝進之酒盡方別

北齊 孟業

按北齊書孟業傳業字敬業鉅鹿安國人家本寒微少爲州吏性廉謹魏彭城王韶拜定州除典籤

長史天保初清河王岳拜司州牧開業名行召爲法曹尋遷東郡守以寬惠著病卒

唐 孟利貞

按尙友錄利貞華陰人父神慶高宗初爲沁州刺史以清介著名利貞初爲太子司議郎中宗在東宮深懼之受詔與少師許敬宗崇賢館學士郭瑜顧引董畏恭等撰瑤山玉彩五百卷龍朔二年奏上之高宗稱善累轉著作郎加弘文館學士垂拱初卒又撰續文選十三卷

孟銑

按尙友錄銑汝州梁人孟子三十一代孫登進士第累官鳳閣舍人轉春官侍郎拜同州刺史神龍初致仕詔河南春秋給羊酒以終其身

孟雲卿

按尙友錄雲卿平昌人登進士第擢校書郎與杜甫元結最契相友善甫服其稽言有孟子論文更不疑句

孟浩然

按唐書孟浩然傳浩然襄陽人少好節義喜振人患難隱鹿門山張九齡爲荊州辟置於府開元末病卒

孟仕源

按尙友錄壽昌有石臨樊水有窠仕源居其下元結命曰杯樽石銘曰時俗澆狡日益僞薄誰能杯飲其守淳朴

孟華

按唐書孟華傳華史失其何所人初事李寶臣爲府官屬論議姦姦不回王武俊斬李惟岳遣華至京師陳事德宗問河朔利害華對稱旨擢檢校兵部郎中武俊僭稱王授禮部侍郎不肯起嘔血死

孟元陽

按唐書孟元陽傳元陽史失其何所人起陳許軍中以嚴整稱曲環領節度使時已爲大將使董作西華屯盛夏臍而立於塗役休乃就舍故田輒歲稔而軍食常足憲宗立遷河陽節度使五年盧從史敗檢校尙書右僕射徙帥昭義軍入爲右羽林統軍封趙國公